





ad parte legitima. 3

85  
- Rei

II 53<sub>0</sub>









3 **Q** ad parte legitima.





Pharmacandi modus.

4  
**Was der Arzt  
in dem Menschen zu Pur-  
gieren habe: Vnd was für  
schäden auß mißverstand des  
purgirens entspringen.**

**Durch den Hoherfahnen herren  
Theophrastum Paracellum, beyder  
Arzney Doctorn.**

*Cum gratia & priuilegio Casareo.*




M. D. LXXVIII.



ad parte legitima

Faint, illegible text, likely bleed-through from the reverse side of the page.



M. D. LXXVII





Dem güthertzigen Leser  
Wünschet Toxites seinen  
Grüß.

**W**S ist eyn altes  
Sprichwort / lieber  
Leser / wer an wege  
baswet / der hat viel  
Richter: Also gehet  
es mir auch mit Theophrasti Pa-  
racelsi Büchern / deren ich etliche  
in offnen truck hab außgehen las-  
sen. Dann die weil er in allen Fa-  
culteten geschriben hat / so seind sie  
auch alle wider ihn / dem ist er ein  
hæreticus. dem andern ein Teuffel-  
beschwerer / dem dritten ein Narr /  
ein Lügner / ein verechter der alten /  
vnd dergleichen mehr.

Die weil ich dann auch in dises  
Kartenspiel eingemischt / vnd von

A ij



Vorred.

etlichen dafür gehalten wird / als wann ich auch ein Nigromanticus were / vnd mit verbottnen künsten vmbgieng / darumb / das ich Occultam Philosophiam, vnd Philosophiam sagacem neben andern Büchern publiciert hab / bin ich verur- sacht worden / in diser Vorred mich zu entschuldigen.

Ich kan nicht in abred sein / wie- wol ich den wenigern theil in den schrifften Theophrasti anfangs ver- standen (darinnen ich mich gleich- wol auch noch nit vil kan rhümen) so hab ich sie doch geliebt / vnd nicht vrtheilen noch verdamen wollen / sunder vestiglich dafür gehalten / das er nit geizt / auch nit hab iren künden / sonder alles wol vnd recht tractirt / dieweil er geschriben / Got hab



Vorred.

hab in zu einem Urket auß der natur gemacht. Dieweil ich dann dieses geglaubt/allenthalben vil mangel in philosophia vnd medicina gespiert/kein rechte Reformation gesehen / vnd in Theophrasto vil das dem menschen zu nutz kumen mag/hin vnd wider in seinen büchern gefunden / vnd mich doch nit in alles künden richten/hab ichs mein vnuerstand zügemessen / vnd verhofft die zeit / welche auch der Rosen müter ist / wurde bessern verstand mit bringen.

Darumb hab ich vermeint/das ich alle seine labores meniglich zü gutem / nit allein möcht / sondern auch auß Christlicher liebe schuldig were zü publiciren/dieweil ich mich diser sachen ein mal vnderwunden/

A iij



Vorred.

daher ich auch alle zeit mit denen  
so Theophrasti Bücher hinderhal-  
ten/vbel zufriden gewesen/vnd dar  
für geacht/sie thun nicht allein wi-  
der die liebe / sondern auch wider  
Gott/dieweil Gott der Herz durch  
Paracelsum medicinam vnd phi-  
losophiam von iren mängen vnd  
irthumben zu Kenouiren/Illustri-  
ren vñ verbessern angefangen/wie  
dann vil Doctores selbs bekent ha-  
ben.

Dann je vnleugbar ist / dz man  
in der Arzney vnd Apotecken viel  
hette mögen verbessern / darauß  
vil böses / vnd grosser schaden biß  
auff die stund bey vielen eruolget/  
das alles zu nachtheil der francken  
vngeendert bleibt. Deren wegen  
hab ich mich von etlichen Docto-  
ribus



Vorred.

ribus vnd andern gelehrten Män-  
nern leichtlich bewegen lassen / das  
ich / wie gemelt / philosophiam sa-  
gacem, vñ philosophiam occultam  
(welche sie bey mir auff das höchst  
gelobt) in offentlichen truck hab auß-  
gehn lassen / vnd vilen darmit ver-  
hofft zu dienen / welches dann mein  
fürnemen alle zeit gewesen ist.

So dann etliche sagen / Theo-  
phrastus hab in jez gemelten vñ  
andern seinen Büchern / so von an-  
dern publiciert worden / vil ding an-  
tag bracht / die Gott der Herz nicht  
offenbart haben wölle / die auch  
dem menschen zu wissen mehr sched-  
lich denn notwendig / vnd der war-  
heit zuwider seyen / So will ich die  
selbigen / wa ihm also ist / mit nich-  
ten verthedigen / auch weder loben

A iij



Vorred.

noch scheltē / auch niemand zūglau-  
ben auffgetrochen haben / sunder ei-  
nem jeden sein frey vrtheil lassen /  
vnd wa ich daran vnrecht gethan /  
das ichs publicirt / so ist es mir auß  
vnbédacht geschehen / das ich mich  
nit bescheme zūbekennen. Dan so  
der heilig Augustinus sich nit ge-  
scheucht hat libros retractationum  
zūschreiben / warum wolt ich mich /  
so ich in publicierung der Theo-  
phrastischen bücher ein thorheit be-  
gangen hette / dieselbige vnderste-  
hen zūvernainen? Ich hab dir Le-  
ser nuß begert zuschaffen.

Das aber ich mit der Nigro-  
mancj vñ andern verbottenen kün-  
sten solte vmbgehn / wirt mit war-  
heit niemandt von mir sagen mö-  
gen. Dann ich die falsche kunst von  
jugendt



Vorrede.

jugendt auff gehast vnd geflohen/  
vnd mit dem verdampften Satha=  
na/meines lieben Herzen vnd Er=  
lösers Jesu Christi vnd seiner gli=  
der höchsten feind / nichts zu thun  
haben wollen / will auch wie einem  
Christen gebürt / mit ihm vnd den  
seinen / inn ewigkeit / wils Gott/  
nichts zuthun haben / vnd bleib bey  
dem heiligen wort vnd warhafftigen  
leer meines Heilands / des ai=  
nigen ewigen Sohns Gottes /  
wer mich darüber anderst helt / der  
thut mir vnrecht.

Wil mich bey dir / lieber Leser /  
der erdichten vfflag halben / hiemit  
entschuldigt / vnd dich ermanet ha=  
ben / das du das gut in Theophras=  
to behaltest / das böß aber / so du=  
etwas bey im findest / in sein werd

A v



Vorred.

lasset bleiben / so wirst nicht vil zu  
Klagen haben.

Damit ich aber auch nit vnder=  
lass dir zu dienen / So hab ich dir  
zügefallen diß Büchlin De modo  
pharmacandi / die weil keine Exem=  
plar mehr vorhanden / vnd aber vil  
güts darinn begriffen / wider zu  
trucken geben. Wirst auch die Bü=  
cher de Imposturis in morbi Gallis=  
ci cura / das Spital büch / vnd das  
Holzbüchlin / so Theophrastus  
selbs geschriben / finden / in welchen  
dreyen du die volkomen Cur der  
Frankosen haben wirst. Ha=  
genaw / den 9. Februa=  
rij / 1 5 7 8.

THEO



THEOPHRASTI  
Paracelsi de modo  
Pharmacandi  
Liber.

Tractatus I.

**S**Or allen dingen ist  
not fürzuhalten vnd zu  
declarieren die letzte ma-  
terien / das ist / von denē  
ich beschleuß diß Libell.  
Nun ist mein fürnemen  
zuschreiben vom Purgieren / darinne kein  
andere haupt sūm ist / dann das wir am  
aller ersten wissen sollen / was doch der  
Arzt endlich zu purgieren hab oder soll.  
Dann auß disem folgt / welcher das niche  
verstehet / derselbig purgieret zum todt mehr  
dann zum leben.

So nun dieser punct vorlauffen soll /  
ehe das ich die materiam vltimam tractir /



so wissen / dieweil so vil irzung bißher im  
 purgieren augenscheinlich seind / vnd das  
 also vil in denselbigen zu verderbung vnd  
 dergleichen gebraucht worden / ist not das  
 alles zu erzelen / was mir hie mag wider-  
 wertig sein / das ist / die treffentliche grosse  
 volumina, so von den alten Scribenten  
 beschriben seind worden / darinnen manig  
 feltig das purgieren fürgenommen wirt.  
 Nun aber so beweist die Practick an ihr  
 selbst / das nichts als ein irzung vnd ver-  
 fürung ist / vnd das noch nie vom ersten  
 Arzet biß auff jekige stund verstanden ist  
 worden / welches oder welches nit der pur-  
 gas vnderworffen sey oder nit. Dieweil  
 nun ein solche irzung wider mich stehet /  
 die so gewaltig beschützt vnd beschirmt  
 sich erhelt / wiewol doch täglich die irzung  
 befunden wirt / jedoch auß gewonheit vñ  
 langem herkommen also erhalten / so ist  
 der beschluß allhie in dem Libel / dz nichts  
 soll purgiert werden / denn was stercora  
 seind. Auff das folgt nun die auftheilung  
 der Arzney / nach auftheilung der stercora,  
 das



Tractatus primus.

3

ra, daruñ wie die stercora seind / vnd was  
ihre geburt / vnd wo ihre statt fürth in  
nachfolgenden Tractaten fürzunemen  
ist / gründlich einander nach züerzelen /  
damit satt vnd gewaltig die vermeinten  
Schriften der Alten / so von den Newen  
vnerfahrenen Arzten / der hohen vñ nidern  
Schülen beschirmt / vñ gestossen werde.

Also am ersten / ist die letzte ma-  
teria stercus. Stercus ist das Erz / darinn  
die speiß oder tranck ligt / zügleicher weiß  
wie ihr sehend / das alle Metallen nicht  
reyn / sonder in eim corpus ligen. Vnd so  
man dasselbige haben will / so muß mans  
von einander scheiden / Wz nu Metall ist  
vff sein theil / was ein Schlack ist auff sein  
teyl / Also ist der schlack stercus metallorū,  
vnd der Metal die essentia, vnd der künst-  
ler der das bereitet / ist an stat des magens.  
Also zügleicher weise wie es da zügehert /  
also auch im menschen / das so wir essen  
vnd trincken / dasselbige muß zügleicher  
weise wie das Erz gescheiden werden.

Nun



Nun ist der magen der Meyster Vulcanus, vnd der stercus der schlack / vnd was in die narung gehet / dasselbige ist die essentia, als vil als sein gold oder sylber. Also ist zu verstehen was die speise sey / vnd was der stercus sey. Nun ist speiß vnd tranck ein ding / das ist nicht das allein der tranck sondern stercora mache / oder die speiß sondern / sonder beyde einerley. Wiewol gleich ist d' stercus vesicæ dem tranck / vnd der stercus intestinorum gleich der speiß / jedoch so hat jeglichs bey dem anderen sein stercus, Also / daß der vrina gleich so wol der speise / vnd der stercus des tranckes ist als wol als allein des tranckes / oder allein der speiß / Wiewol eins mehr gibt dann das ander / jedoch so scheidet sich die engenschaft des stercus nicht hierinn / allein sein natur. Also sey gnüg erkläret der erst anfang. Nun ist nachfolgendt ein solche berichtung noth. Ihsiehend das wir gezwungen werden auff erden zu scheiden vñ zu leutern alle Bergswerck / darinne zu lernen vnd zu erfahren /  
dann



Tractatus primus.

5

Dann in jnen ist das wir haben müssen. Also auch dergleichen wie wir nun zu demselbigen gezwungen werden / vnd ist nur das eusser / also noch vil mer werden wir gezwungen von dem innern / dasselbige zu erhalten vñ zuhaben. Wie nu sich scheiden die zwey ding von einander / als das gold vnd silber gehet durch die hend des künstlers / aber die Wirkung des wachsenden forns geht allein auß der natur. Also wissen auch hie / daß die innere scheidung keiner kunst notturfftig ist / als allein forchens. Zu gleicherweiß wie der Bawz allein sähet / bedarff nit sorgen oder wissen / wie er den strohalm machen wölle / wie er die äher setzen soll / dise dinge sorget die natur / sein sorgen ist allein zu sähen. Also mit dem so wir gezwungē werdē im leib zu haben / nit dariñ zu lernen wie wirs formiren / od' wie es nuzlich od' bequemlich sey / Dergleichen auch / dieweil die kunst der mineralischen scheidung so mit vil künstē vñ griffen zu erhaltē ist gefehrlich / vñ mit mancherley sorgē vñ zweifelhaftigkeiten beladen



beladen ist / solches alles in der inwendigen scheidung außgelassen / vnd allein die vorbereitung des kochens / wie des acker gehens / die natur fordert. Wann nun aber solches nit beschehe / sonder vnberet tet wurde es dem leib vberantwortet / so wurde dieselbige scheidung dermassen wirken / als so ein korn in ein acker fället / vnd sähet sich selbst / deren wenig wol ge rathen. Also sey genügsam angezeiget diß fürnemen.

Dieweil wir nuhn also / wie obstehet / zu speiß vnd tranck gezwungen werden / wie das Erß zu einem Bergmann / oder ein Bergmann zum Erß / so wissen in den selbigen / in was wege es die Natur in ein stercus machet / dann auß demselbigen wirdt genommen werden das jenige / das inn nachfolgenden den Beschluß geben wirdt / durch welches die irrung der alten fürgehalten / vnd satt vmbgestossen. Das selbige geschicht also in den wege : Alles das so wir essen vnd trincken / das hat ein sack / darein es erstmals felt vnd kompt /  
dem



Demnach so wisse/so es nu also in den sack  
kompt/ wie es darinnen gehandelt wurde  
vom mund bis auff den anfang der In-  
testinen/dz ist des Magens vnder lochs/  
ist als ein künstler/ das ist/ was zwischen  
der weiche vnd Region begriffen wirdt/  
dasselbige ist alles voller virtutis digesti-  
ua. Auß dem nu folget/ das etliche speiß  
im mund nach der letzten materia schme-  
ckē etwa auß dem orificio des magens zc.  
Darumb ist es nicht alles in den magen  
kommen/ sonder vil in den obern theilen  
bliben/ vnd ist gleich doch die eine Dawa-  
ung vnd die rechte.

Nun auff das so also im magen ligt/  
so ist die erste arbeit/ daß der Künstler der  
Natur anfenglich anhebet zu scheiden/  
So er nun scheiden wil von einander die  
Schlacken von den Metallen/ so Putri-  
ficiert er erstlich. Dise putrefaction diene  
allein zu der scheidung. So er nun das be-  
reit hat/ das gnügsamlich gescheiden mag  
werden/ so folget auff das ein ander Künst-  
ler/ derselbig ist zwifach. Der eine nimpe

B



den stercus, vnd gehet mit ihm biß in den  
 Affterdarm / vnd bereitet denselbigen im  
 afftern wie er sein soll außserhalb / daß im  
 magen wirt kein stercus geboren / aber die  
 materij gebürt sich drinnen / auß krafft der  
 scheidung. Vnd darnach felt darein der  
 bereiter stercorum, vnd scheidet denselbi-  
 gen / das er zu anderen dingen mehr gü-  
 sey. Mit das er außgang von den intesti-  
 nis wie er im magen wirdt / dann er were  
 zu nichten gü noch nüz / darumb ihn die  
 natur weiter bereitet / auff das er am be-  
 quemlichsten sey außzutreiben / sey mit  
 grossen arcanis bezabet / als die grossen  
 Philosophi bezeugen / vnd die grosse er-  
 farenheit / daß die natur denselbigen sterc-  
 cus also vermeynt vnd bereydet / darumb  
 weit ist fehl / vnd ein irrung / das der sterc-  
 cus solle die eingeweid füren / vnd auß  
 denselbigen von ihm geben / also verwand-  
 delt werden. Anderst ist die narung der  
 Intestinen / anderst ist die geberung des  
 stercus.

Nun aber ist das also gesagt vom sterc-  
 cus



Tractatus primus.

9

cus des magens / das ist von dem der im  
magen geboren wirt. Nun seind die ster-  
cora noch mehr hin vnd her im leib ver-  
ordnet / von den selbigen nemet ein solche  
kurzen bericht: Der eine Künstler der ein  
stercus machet / scheidet sich vom andern  
der nicht stercus machet / dann er ist zwey-  
fach. Nun so der ander also das er nimpt  
was von der essentia ist / vnd gehet mit  
demselbigen in die Lebern / vnd ist noch  
nit bereitet. Vnd das selbige so es in die  
Lebern kompt / da gehet an erstlich eine  
außtheilung / so weit vnd so vil der diges-  
tiones im leib seind / deren seind wunder-  
barlich vil / Nemlich / ein jegliches haupt-  
glied hat seine besondere Digestion / vnd  
nimpt in der Lebern was ihm zugehört /  
vnd wirt gefürt in sein magen. Also ist  
ein Magen in dem Herzen / einer in dem  
Milch / einer in den Nieren / einer in dem  
Hirn / einer in der Gallen / vnd einer in  
der Lungen. Nun diese w<sup>z</sup> sie ziehen von  
der essentia, ist vns verborgē. Das wissen  
wir / das eins jeglichen glids narung in

B ij



brot ligt/ auch im fleisch/ vnd dergleichen/  
Wie vilerley aber in der speise sey/ vnd  
welcherley/ vnd wie es nach den gliedern  
des leibs außgetheilet werde/ ist vns ver-  
borgen. Das wissen wir aber/ das also ist.

Nun auff das so ein jegliches glid an  
sich zeucht dasjenige das ihm zugehört/  
roh ist/ vnd es ihm solte bereyten/ dann ge-  
het ein neue scheidung an/ durch ein ne-  
we putrefaction/ vnd werden neue ande-  
re materien geboren/ deren emunctoria  
wir nit augenscheinlich haben aller/ son-  
der etlicher. Dann wir wissen/ das sich  
die Lebern durch den schweiß emungiert/  
vnd wissen/ das das Hirn durch die nasen  
aufstreibt/ vnd wissen/ das die Nieren  
durch die Blasen außgehen/ Aber wir  
wissen vnd sehen nit die emunctoria des  
herzens/ des milkes/ &c. Vnd zügleicher-  
weise wie franckheiten geboren werden  
auß dem harn/ auß dem stercus in den in-  
testinis/ &c. Also sollend jr auch wissen  
von disen verborgenen emunctorijs, wela-  
cher franckheit vrsprung vnd vrsach biß-  
her



Her verborgen / vñ fälschlich durch irzung  
anderen materien vnd vsachen zugelegt.

Also dergleichen so wissendt / dieweil  
die hauptglider ein jeglichs seinen sonde-  
ren magen hat / dergleichen ein jeglichs  
sein sondere Excrementen / vnd excremen-  
tische franckheiten / also sollen ihr auch  
wissen in den wenigern glidern des leibs /  
als vom glidwasser / vom liquor, von dem  
geäder / vom fleisch / von dem marck / von  
den beinen / ꝛc. Dann dise ding alle  
haben gleich so wol ihre engene digestio-  
nes, separationes, vnd geberung der Ex-  
crementen / vnd gleich so wol ire emun-  
ctoria, vñd excrementische franckheit.  
Dann ein vsprung ist Podagra vnd Co-  
lica / Ein vsprung ist apostema narium,  
vnd restrictio vrinae, ꝛc. In solchem pun-  
cten sollen die Excrementische franckhei-  
ten ermessen werden. Darumb nicht mit  
kleynen sorgen die falschen geschriffien  
der hohen Schulen / lehr vnd anweisung  
gefürt vnd gehandelt / wirdt anderst vnd  
anderst vorgehalten / dann an im selbst die



warheit begreifen mag. Dann in den bü-  
 chern von den Excrementischen franck-  
 heiten bescheidenlich von wort zu wort erz-  
 zelet vñ bewert wirt. Also weiter wie auß-  
 gelegt seind die mancherley art der Mä-  
 gen / vnd ihre emunctoria, also sollen ihr  
 auch wissen das ein sondere Digestion  
 im munde ist / das ist ein Digestion des  
 Hauptfleisches. Nit das es im munde al-  
 les Digerirt werde. Dann was im munde  
 Digerirt wirdt / das gehet in stercus  
 intestnorum / dann ein stercus ist in diser  
 Region des Magens. Nun ist aber der  
 spenchel im munde ein excrementum,  
 vnd wirt geboren zügleicherweiß wie ein  
 stercus intestnorum, in der Digestion ca-  
 pitis, also aber wie ein spenchel verendert /  
 dann anderst vnd anderst seind die excres-  
 menta gescheiden / nachdem vnd die statt  
 des emunctorij edel oder vnedel ist / also  
 auch lieblich oder vnlieblich die excres-  
 menta verornet seind. Also weiters so sind  
 sondere mägen in augen / in ohren. Dann  
 die ohren haben gleich so wol jren eignen  
 magen



magen/als die andern glider. Nun ist ihr  
stercus das ohren schmalk. Also haben die  
augen auch jren eignen magen / vnd ihre  
Excrementen seind die lachrymæ, die sich  
nach dem schlaff in augen erzeugen / vnd  
was also weiter augenflüsse sind. Augen  
franchheiten die erkenne mit gleichem vrs  
prung / process vnd ordnung zu sein wie  
Colica in dem gedärme. Dann also mit  
hohem fleiß sollen die Excrementischen  
franchheiten vberal wol betrachtet wer  
den/dann hierinn ligt die vrsach/die mich  
zu schreiben bewegt / auff das die Excre  
mentische franchheiten erkent werden/vñ  
so die erkant seind/so wissen jr/das der mo  
dus purgandi daher allein dient/vnd weis  
ter zu feinen andern franchheiten. Dann  
ein jeglich Purgatiff ist darumb beschaf  
fen/ die stercora hinweg zunehmen / vnd  
nichts anderst. Dieweil nu also die ster  
cora so mancherley geschlecht in ihnen  
selbst haben/vnd werden also auß so man  
cherley digestionib. geboren/warum sage  
dan die Art d' alten sopistery / dz sie solle



auß 4. dingen allein werden? Vnd wöls  
 lend/ das die stercora seind der Melanco-  
 ley/ vnd seind die Colera selbst / Dariñen  
 sie augenscheinlich beweisen irē irthum/  
 dieweil so gar nichts anderst hie zu ver-  
 stehen ist inn geberung stercorum, denn  
 allein virtus generationis, vnd das der  
 stercus auß derselbigen krafft geboren  
 wirt. So nun das also ist/ so vergleicht es  
 sich dem gewechß der Erden/ also / Wer  
 kan sagen / daß der baum Fraxinus auß  
 der Colera od' Melancolia wachse? oder/  
 wer kan sagen / so er gewachsen ist/ das er  
 Colera/Melancolia/oder Phlegma sey?  
 Vnd als wenig diser baum vmb solche  
 humores zu vrtheilen ist/ also wenig mag  
 auch geurtheilt werden die eigenschafft  
 stercorum. Dann wie eines vrsprung/ als  
 so ist auch des andern. Vnd wiewol der  
 Fraxinus auß dem samen wechset / vnd  
 der stercus als ein excrementum, so ist  
 doch diser stercus geborē worden / wie der  
 Fraxinus, zügleicherweise er mit solcher  
 scheidung wie ein frucht auß dem baum  
 herauß



herausß gehet / auß solchen krefftten / formis-  
rung / art vnd eigenschafft wächset auch  
der stercus. Vnd wie in den fruchten kein  
humor befunden wirdt / dergleichen auch  
nit mag dahin geurtheilt werden / also der  
massen als wenig magstu auch im stercus  
vrtheilen in die humores, als dann bißher  
beschehen. Den gelben stercus hastu *Co-*  
*leram vitellinam* geheissen / den grünen  
*Coleram prassinam*, vnd also mit vil sel-  
tsamen namen coloriert. Vnd ist nit ver-  
standen worden die *generatio stercoris*,  
sonder gleich geredt als sprechen ihr / Die  
gelbe Birn ist *colera vitellina*, oder die  
grüne Schlehen seind *colera prassina*.  
Wie sich dasselbige reymen wurde / also  
reymbt sich auch hie ewer fürnemen vnd  
grund de *stercoribus*. Vnd so ir sprechen  
werden / anderst ist die Medicin / anderst  
ist die Philosophen / anderst ist also der  
vrsprung der Biren / vnd der Schlehen /  
also anderst ist auch der vrsprung des ster-  
cus. Dasselbig redt allein der Sophist /  
der in *philosophia* noch *medicina* keinen



grund noch erfahrenheit hat. Also anderst  
vnd anderst setzen sie ihre schragen / vnd  
wollen ihre heuser auff ein solchen sand  
grund bawen. Dann mehr leret sie ire er-  
fahrenheit nit / sonder glauben demütiglich  
den fliegenden Genstern. Also sey in di-  
sem Tractat gnüg geredt / erkandtnuß /  
was die materia sey / von deren ich be-  
schliessen werde.

## Tractatus II.

**J**etweil nun ein jeg-  
liches ding das da isset /  
sein stercus machet / vnd  
wie obgemelt ist / dassel-  
bige in mancherley weg!  
So ist hierauff notwen-  
dig zuwissen die eusserlichen stercora, vff  
das ihr die innern dardurch wissen zu er-  
kennen / So wirt in der Philosophen be-  
griffen / daß der mensch in ihm beschliesse  
die ganze welt / das ist / das er ire theilung  
in ihm



in ihm hat. Dieweil nun die selbige theilung in ihm verfaßt/ so ist auß dem zu ergründen / was innen sey durch das eusser zu erkennen. Vnd wiewol die eusserliche treffliche mancherley geschlecht seind/ der massen sollen ihr auch wissen/ das so mancherley auch inwendig seind. Dann es ist vnbegreiflich zu verfaßen in ein Libell/ das so treffenlich weit außstreichet. Vnd wie die erfahrenheit außwendig nit gar zúsamén in ein kopff mag gebracht werden/ das ist in ein verstand/ also sollen ihr auch wissen / das es gleich so wol vnmöglich ist den menschen inwendig gar zu erkennen / Darumb fälschlich irrend die da wollen so gering vnd leicht den menschen in vier humores fassen / der da sol so weit verfaßt sein in seiner erfahrenheit vñ weißheit / als weit die ganze welt außwendig begreiffet / das ist / alles das in der ganzen welt ist soll er wissen. Wo er nun solches nit weiß / so mag er sich nit berühmen der Arzney ganz zú sein / als die Humoristischen Arzt sich geuden.

Nun



18 De Pharmac. modo

Nun hab ich vormals angezeigt etliche digestiones, vnd ihre stercora. Nun ist es nicht gar begriffen/ sonder allein der Proceß der stercorischen geberung/wie gesagt ist/also in allen. Zu gleicher weis als einer der da anzeigt wie die gewechß auß der erden wachsen/bekandtlich vnd vnbe-  
kandtlich / vnd wie die bekandtlichen / also auch die vnbe-  
kandtlichen. Also begreiff ich auch hie ein geberung der stercora, wie in den hauptgliedern / vnd in denen so angezeigt seind / also auch in den andern. Auff solches dieweil die genera sich so weit außtheilen in der welt / vnd so mancher-  
ley stercora seind bey dem höchsten dem Arzt züerfahren / wil ich von denselbigem ein vnderricht geben in kurzem begriffen.

Erstlich zü erkennen alle die ding die da stercora geben / seind die ding die da essen / vnd alle ding die da essen / seind die da leben. Nun ist hierinnen die höchste erfarenheit vnd wissen / was da lebe oder was da nit lebe. Vnd alsdann was  
da lebt/



da lebt / dasselbige erkennen in seiner Digestion / vnnnd auß derselbigen Digestion erkennen sein stercus, welcher anzeigen grund vnnnd erkandtnuß vrsprungs der menschlichen stercoreum, auch ihr vnterscheid wie dieselbigen seind. Vnd wie wol die krankheiten so excrementales seind / hie nit begriffen werden / so verfaßt doch der grund des wachsens derselbigen materien / vnnnd das gewachsen ist / in seinen sondern Büchern gemeldt. Dañ ein ander Buch ist den Baum zubeschreiben / ein anders die fruchte zubeschreiben.

Wie nun gemeldt ist das alle ding die da leben / essen / eins wie dz ander die speiß haben müß. Dann also ernehren sich die menschen / also die gewechß der erden / also auch die stein im wasser. Nun ist allein todt das da nit isset / das ist / das in seiner narung nit ligt. Ihr sehend dem mensche wirt sein narung zügetragen von ihm selbst / vnnnd er müß der speise nachgehn / Desgleichen auch was da empfindlich vnnnd beweglich ist / dasselbige müß der  
frissen /



krippen / das ist / der narung nachgehen.  
 Nun aber die da nit beweglich seind / den-  
 selbigen gehet die narung nach. Dem  
 Magen muß man die speiß zütragen / das  
 ist / man muß ihn zü der speise tragen. Die  
 aber nun der magen speißt / dieselbigen  
 müssen auch dem Magen nachgehn. Denn  
 alles was da empfindlich ist / muß demsel-  
 bigen nach gehn. Aber in den vnempfind-  
 lichen die ligen stille / vnd ligen in irer ei-  
 genen narung / in ihrer eigenen kuchen.  
 Als ihr sehend die Baum die da wachsen  
 auß ihrem speißhafen / auß ihrem keller /  
 vnd ihnen wirdt speiß vnd narung zü ge-  
 tragen / vñ sie haben nichts. Also die stein  
 im wasser / dieselbigen dermassen in ihrer  
 narung auch ligen. Wie nun dise ding in  
 ihrer eignen narung ligen / also geben sie  
 auch ihre stercora. Der stein reyniget sich  
 von innen heraus / vnd legt ein mieß ober  
 sich / dasselbige mieß ist sein stercus, wie  
 wol in jm das wasser offt abwäschet / offe-  
 nit. Nun ist dasselbige gemieß auß dessel-  
 bigen steyns narung allein. Nicht das du  
 meynen



meynen wöltest daß das nutriment des  
 steyns in mitten des steyns gang / sonder  
 sein Magen ist aufferhalb dem steyn / vñ  
 zeucht an sich sein narung / vñnd digerire  
 sich auff dem stein. Darumb die steyn die  
 in der speise genommen werden / in ihzen  
 krefften vñd arcanis lebendig erscheinen /  
 vñd die andern die nit in der speiß ligen /  
 mangeln derselbigen arcanen, vñd haben  
 andere arcana in ihnen / gleich als ein  
 Mumia gegen ein menschen / also ist das  
 wasser aller deren narung / die im wasser  
 ligen / die erden deren so in ihr ligen / der  
 Luft des so in ihm ligt / das Firmament  
 des das ihm züsteht.

Solche ding seind zü erkennen / dann  
 da werdē die vrsachen gefunden / warumb  
 die stercora / oder wie sie sich theilen / vñd  
 wie ein jeglichs genus sonderlich sein ex-  
 crementū beweiset. Also auch der mensch  
 solche genera in ihm hat / vñd solche auß-  
 theilung mit solchem verstand / vñd mit  
 solcher erfarenheit.

Nun aber merckend ein Exempel zwis-  
 schen



schen den steynen im wasser / vnd denen  
 aufferhalb dem wasser / das der im was-  
 ser stehet in seinen liquoribus, vnd der  
 aufferhalb stehet im verlust derselbigen.  
 Hierinnen nun die irzung ligt der Alchi-  
 misten / vnd deren die da suchen Essentiam  
 quintam, vnd gieß grossen Elixir wollen  
 bereyten / grosse magisteria vnd arcana  
 suchen / vnd gebrechen im grund das le-  
 bendige vnd das todt voneinander zu er-  
 ken. Nun sehend an den Magnet/  
 derselbige muß essen / vnd ohne speiß thut  
 er nichts. Nun zü gleicherweiff wie ein  
 mensch ohne speise sich verzehret / so lang  
 biß er stirbet / also auch der Magnet / so er  
 von seiner speise kompt / sich selber ab isset.  
 Nun sehend ihr / so er sich abgeessen hat /  
 so hat er virtutem attractiuam nimmer.  
 Also auch der Adamas hat eine grosse  
 herte in ihm / wirt ihm seine speise nit ge-  
 geben / so verleurt er sie. Sein speise ist  
 ein truckner lufft / der nasse lufft weychet  
 ihn. Nun ist die weychin sein tod. Also  
 essen alle gesteyn vnd steyn / alle hölzer /  
 vnd



vnd alle gewächß. Nun geben sie ihre stercoꝛa, dieselbigen stercoꝛa seind lufft. Als der Carabe / so derselbige in versperreten wassern ligt / ohne zu vnd abgang des luffts / so coagulirt er durch seinen lufftigen stercoꝛa das wasser / das es zu wüermen wirt. Also auch der Saphyr seine stercoꝛa gibt luffts weise von ihm / mit solchen erkendnussen. Also auch vom Menschen ein ander stercoꝛa ist oder wirt / ein ander die Substanz / welcher noch vil sichtbar vnd vn sichtbar / wesentlich vnd vnwissentlich von menschen gehend / die noch nie erfahren seind. Also leben alle ding in der speise. Vnd dieweil sie leben von der speise / dieweil seind sie vnder dem Arzte. Mehr selig vnd aber selig ist der Arzte / der die Arzney lebendig erkennet / vnd weißt sie zu gewinnen / vn weißt daß sie nit todt ist.

Nach solchem allem seind vil Arzney jek in der welt / die da todt seind / vnd sterben mittend an. Darumb der Arzte wol sprechen mag / vnd klagen seine noth.

E



Dann der Himmel jüngeret sich / vilerley  
 gewachsen alter ist hie / vnd der todts dar  
 mit. Aber der newe Himmel wirt erneuert  
 werden das jenige / das den zukünfftigen  
 dienen sol. So wirt als dann die Arzney  
 mit ihren arcanis widerumb in krefften  
 sein. Was nun ein jeglich ding esse / was  
 rinn es nun gespeiset wirt / seind bey den  
 magnalibus Dei. Das wissen wir wol/  
 das vil hundertterley narungen müssen  
 im leibe sein / vnd seind dieselbigen alle in  
 ein bitten / also vil tausenterley narung  
 in der grossen welt / Wer ist der sie erkens  
 net? Das seind magnalia, die der Natur  
 verborgen seind magnalia Dei, vnd nicht  
 magnalia naturæ luminis. Das ist aber in  
 der Experiensz erfahren / das der Chaos mi  
 neralis fuore vnd nehre die unbeweglich  
 chen dinge / Vnd der liquor mercurialis  
 der füret die wachsenden vnd entpfindt  
 lichen / Vnd caro salis füret die empfind  
 lichen. Wer ist aber der / der die magnalia  
 wiste auß zütheilen? Ein vnsichtbarer ist  
 der sie kochet / vnd die grossen dinge ligen  
 in dem



In den vnſichtbaren / vnd das wenigſte in den ſichtbaren. Darumb die irzung offenbar wirt / die da vnſichtbar durch das ſichtbar vrtheilen / das iſt / ſie haben die ſichtbaren / vnd vrtheilens nit ſichtbar / ſonder vnſichtbar. Also ſollen ihr wiſſen das alle ding in der ſpeiſe ſtehet / vnd nichts ohne ſtercora lebet. Vnd auß diſer erkandnuß / wie die ſtercora zu erkennen ſeind / ſollen ihr auch wiſſen von den ſtercoribus der Menſchen / vnd wo ſolcher verſtand nit iſt / am ſelbigen ort iſt auch kein modus practicandi, dann auß diſen dingen nimpt er ſein vrsprung / das ſeind ſeine elementa, anfang vnd grund wachſen hierauß. Weiter / das ihr Coleram heißen / oder Melancoliam / in welchem kein grund iſt weder der Philoſophie / noch keiner warheit gemäß / vnd welche Medicin hierauff gegründet iſt / dieſelbige ſtehet ſorglicher dann ein federn auff ein einfeldt / die für vnd für bewegt wirdt.

Nun iſt von nöten der eußern ſtercorum kundſchafft zu haben / auff das also



die arhney auch verstanden werde / vnd  
 der mißbrauch in modo purgandi, wie er  
 von den alten Scribenten fürgeben ist  
 worden vnd gehalten / nit gebraucht wer-  
 de. Dann nit nach den humoribus, sun-  
 der nach art der stercorum theilt sie sich  
 auß. Darumb so sagen nichts von humo-  
 ribus, sondern von stercoribus. Dann  
 was ihr von stercoribus reden / dasselbige  
 ist war / wann ihr reden auß den digestio-  
 nibus, vnd was auß den digestionibus re-  
 det / das redt in der warheit / vnd erfinde  
 sich / vnd probiert sich / so ihr in den humo-  
 ribus weder probieren noch anderst be-  
 weisen mögen. Darumb so irrend ihr im  
 Purgieren / als ihr dann selbst mit ewern  
 thaten beweisen / das ihr Purgierend das  
 nit hilfft. Nun soll ein jegliche Purga-  
 tion ein Cur sein / vnd sol heilen dieselbi-  
 ge franckheit / für die sie geben wirdt. So  
 nun dasselbige nit beschicht / so stehend ir  
 in irrung / vnd beweisend das ewere kunst  
 nit gerecht ist / noch auch ewere Clistie-  
 ren / vnd ander loca emunctoria, die ihr  
 suchen



suchen als blind vnd einäugig / das fürwar so es der gemeine Mann verstünde / erzitterte ab ewerm ansehen / das ihr eweren modum pharmacandi so gar on allen grund setzen vnd bawen / vnd also gefährlich handeln. Dann so ihr betrachten wannen her der sterCUS geboren wirt / vnd wie mancherley er kompt / ihr müßten selbest in solchen dingen erschrecken. Sich gebürt einem jeglichen Arzet in solchen sorglichen Arzneyen ein verstand zuhaben / das er ihm ließ die Arzney ein Exempel sein / vnd dieselbige für sein Theorick hielt / also / das ihr außmessend / wie vilerley der Laxatiuen seind / vnd wie so selkamen ihre Wirkung vnd Operation. Woher meinen ihr das da kom̄ / darab jr euch oftmals verwundern / was da sey das außgetribē wirt? Auß nichtem anderst kompt es / dann allein auß solchen selkamen digestionibus, die so wunderbarlich durch die Laxatifen vnd Purgationen in ein Substanz gefürt werden / vnd wunderbarlich gezogen auß ihren emunctorijs.



ad parte legitima

Vnd darumb das es per anum gehet / so muß es alles das einige sein / vñnd geben euch weiter in kein verstand. Es ist hoch vñd mechtig zu betrachten / daß das vber vnseren verstand ist / das wirs nach der Natur vrtheilen / dann es ist vber vnsern verstand die fuozung vñ der stercus / wie gemelt ist. Es ist aber wol verstandlich die vier Humores / wie ihrs sehen / mit ihren außtheilungen. Nun aber dise ding müssen nit verständig sein / sondern man muß wissen den Proceß / vñd nachfolgent nit was im Proceß ist. So mögen wir dise ding mit keinem namen nennen den humoribus nach / sondern der statt nach / dieselbige muß den namen geben. Nun ist die statt der Digestion / vñd die mater der Separation. Disß alles ist allein darumb angezeigt / das ihr die stercora nicht wöllen inn den humoribus suchen / noch auch die humores in den purgatiuis purgieren / dann die humores seind bey keinem bewerten Arzet nie gewesen.

So sollend ihr auch nit mit weniger  
 ver





verstand wissen einen grossen puncten es  
 wers irsals / in dem ein jegliche franck-  
 heit hat gewalt die stercora zu verändes-  
 ren / hat also auch gewalt dieselbigen zu  
 endtferben. Nun merckend aber in dem/  
 das dieses keinem Arzt züstehet zwey zu  
 vrtheilen / sonder für eines / vnd das also:  
 So du woltest hie die stercora für dich  
 nemen / vnd dir lassen dieselbigen signa  
 sein / vnd indicia zu geben der franckhey-  
 ten / daran wirstu fehlen / vnd all dein  
 Practica mit dir. Am ersten erkenne ob  
 die franckheit die stercora regier oder nit.  
 Regiert sie die stercora, so purgier in  
 fein wege. So aber die stercora die franck-  
 heit regieren / so purgier die stercora, so  
 gehet die franckheit hinweg. So du aber  
 franckheit vnd stercora mit einander fü-  
 ren wilt in dein Practick / so bistu ein ver-  
 derber der Digestion / vnd betrachtest nit  
 das solche irrung kein Cur ist / sonder ein  
 langes täglichs auffspannen. Darinn ge-  
 hört die erfarenheit vnd das wissen / das  
 alle die franckheit so da vermögen in den



digestionibus dieselbige potentiam zu res-  
gieren erkennest. Dann etliche Franckheis-  
ten seind die da in dem magen des leibs li-  
gen / wie dann die magen im leib getheilt  
seind. Etliche die da aufferthhalb der ma-  
gen ligen. So nun solche Franckheiten  
andere stercora machen / warumb sollen  
dann die stercora humores sein / dieweil  
sie nit auß den humoribus entspringen/  
vnd ihre Franckheit seind nit humorales?  
Das aber alles verantwortet ewere So-  
phistery mit dem selbigen / vnd habt euch  
mit den humoribus eine sonderer Profes-  
sion gemachet / damit euch die Philoso-  
phi nit kunten drein reden / vnd die artifi-  
ces naturæ, vnnnd die naturales von euch  
gescheiden wurden / darmit das ihr ewer  
pracht allein fürten / vnnnd euch nies-  
mands drein redte. Darumb so mercken/  
hetten ihr die Sophistery mit den humo-  
ribus nicht erfunden / so müßten ihr rech-  
nung geben den Philosophis / was ihr  
kündten in Philosophia. Auff das hetten  
ihr nicht wissen zu respondieren von den  
stercoris



stercoribus der steynen / des holzes / des  
grases vnd dergleichen / von ihren nutris  
menten. Hatten auch nit wissen zu Res  
pondieren den medicis naturalibus, die  
ihren grund nemen auß der Experientz  
der eussern natur. Vnd da ihr euch also  
selbst vntäuglich gesehen im grund der  
Medicin / auch Philosophj / vnd Astrono  
mey / vnd in andern naturalibus, haben jr  
vier Humores erdacht / die niendert in kei  
ner Profession gegründet mögen wer  
den / als allein auff ewere Fantastische  
Föpffe / vnd also darmit die Philosophos  
vnd veros naturales vberredt / die humo  
res geben den Arkt / vnd auß den humoris  
bus sey die kunst des Arzts / vnd also wie  
ihr wöllend mögen ihr die humores reyn  
men. Endlich es ist ein hübscher betrug /  
das einer ein Facultet dermassen Sophis  
ticiren kan / das sich die Narren sündern  
von den Weisen / vnd vberreden die weis  
sen / sie seind die rechten. Durch die So  
phisticierung seind ihr im friden bliben /  
vnd niemands wider euch geredt / nie

E v



mand hat ewer geucheren wissen gehabt.  
Wolt ihr rechte Arzet sein / so müßt ihr  
euch in die gemeyn der gelehrten geben/  
vnd vber sie alle gelehrt sein / vnd euch  
nichts sündern.

### Tractatus III.

**V**n von der vnder-  
scheid die da ligt in vir-  
tute digestiua, die da vr-  
sachet die mancherley ge-  
stalt vltimæ materiae.  
Nun ist dasselbig ein an-  
zeigung / dieweil virtus digestiua nicht ei-  
nerley ist / so soll auch die Arzney purgans  
di nit einerley sein. Dann offenbarlich  
vnd gnügsamlich wirt hie begriffen / das  
nicht nach den humoribus, sondern auß  
dem verstand der Digestiuischen wür-  
ckung der Arzney sol ermessen werden.  
Vnd was aufferthals diesem ist / das ist  
nicht



nicht Arzneyisch / dann auß dem eussern /  
was die welt begreiffet / sol auch das inner  
geurtheilt werden / vnnnd gescheiden von  
einander / vnd das ermessen / wie weit der  
stercus cerebri sich scheide in dem wesen  
vltimæ materiae, von den stercoribus in-  
testinorum. Ist nun das ein wunderbar-  
liche veränderung / vnd ein seltsame wir-  
ckung / die da beyde stercora seind / vnd so  
vngleich einander / daß auß demselbigen  
auch genomen werde / das also auch in der  
Arzney ein solcher vnderscheid was den  
intestinis, vnd was dem Hirn zugebürt.  
Dise erkentnuß schäze ich für den größten  
puncten im purgieren / dann vrsach / die  
arzney will daß sie nach den theilen des  
leibs werde geurtheilt / nach der statt / nach  
der selbigen eigenschafft / welche außtrei-  
bung in den vier humoribus gar verschlos-  
sen wirdt / der grund ist vil zuring vnd zu  
leicht / das nichts mehr von nöten sol sein  
zu betrachten / dann vier ding / vnd die an-  
dern alle vergessen bleiben.

Nun ist doch derselbigen vier ding art  
vnd



vnd ihz scribenten/ daß sie in dem leib keine statt besitzen. Dergleichen so vermags die Anatomey der natürlichen auftheilung nit/ das in keinerley wege stett im leibe seind/ darinn solche vier humores entspringen. Es mag auch die Anatomey der Franckheiten nit leiden/ das nur vier müttern seyen/ vnd nit mehe.

Dise vnderscheid alle sollen allen denen die da wöllen in der arkney handeln/ bekant sein/ das sie kommen allein auß der Microcosmischen art / auff das der mensch gleich sey der grossen welt. So nun der Mensch sol sein wie die grosse welt / vñ sol der selbigen gleichmessig sein lauffen haben; also das die eussern den innern / vnd die innern den eussern gleich sehen / so müssen die Sophistischen humores weichen / Dann des menschen Anatomey in seiner natur / ist die Anatomey der ganzen umbgefasten sphaera / vnd so himel vnd erdtrich werden zergehen/ so zerget die grosse Anatomey. Also gleichermassen so der mensch stirbt/ so zerget



gehet die kleine Anatomey. Vnd wie im  
Himmel Sonn vnd Mon jhren schein ver-  
lieren / vnd wie die Sternen vom himel  
werden fallen / also auch im menschen vor  
dem vnd er stirbt. Vnd wie der mensch  
zergehet vnd zu nichten wirt / also auch  
wirdt himel vnd erden jhr end nemen.  
Nu wissen auff solches weiter ein Exem-  
pel vom Himmel. Warumb ist der Himmel  
so wunderbarlich gemachet? Warumb  
hat er so seltsame Wirkung in ihm? Allein  
von des menschen wegen. So er nuh  
nichts hat / als allein das dem Menschen  
zustehet / so muß der Mensch corpora vñ  
loca haben / darinnen der Himmel seine  
Wirkung volbringt. So nun das sein  
muß / vnd der mensch muß so vil loca ha-  
ben / so vil der Himmel operationes, so folge  
hierauff / das auß dem Himmel der mensch  
in die Anatomey gelegt wirdt / vnd nicht  
auß dem Menschen der Mensch selbst.  
Dann solte der mensch sich selbst anzei-  
gen / so ist blind was in ihm ist / vnd blind  
seind die Arzt die auß seiner Anatomey  
wach.



wachsen. Auß der Astronomey müß d'Arzt die Anatomey nemen / dieselbig ist sichtbar / das im menschen vn sichtbar ist / vnd ist doch in ihm / vnd wirt verneint das die stett des Himmels nit mögen in ihm begriffen werden / welche vberflüssig in der haut beschlossn seind.

Dieweil nun von aussen an der Arzt seines Subiects erkandtnus nimpt / nicht allein im Himmell / sonder auch in der erdē / die augenscheinlich die Anatomey des menschen anzeigt / das nimmermehr im menschen mag mehr solche Anatomey erfunden werden. So nun die Globul vnd die Sphera dem Arzete anzeigt Anatomiam / warumb vnderstehet er sich dann nichts zu künden in der Astronomia, vnd nichts in naturalibus? Darumb das ihm solches zu lernen zu vil ist. Sophisticieren vnd Sophisterieren ist aller welt wol möglich / das ein jeglicher von ihm selber lernet / vnd spintisiert sich selbs darnach gelert vnd erfahren auß der welt klügheit / als dann die Humorischen Arzete seind / mögen



mögen leicht studieren / wissen oder können das Freyburg / Wien / oder Erffurdt auß einem solchen Gul ein Doctor machē / In dem ist die Arzney verderbt worden / da es darzu kommen ist / daß sie sich von den gelehrten gesondert haben / wie ein Hundtschläger von den leuten. Nun sol aber der Arzt ein lehrer der Philosophen vnd Astronomen sein / vnd von im sollen sie lernen. So nun das sein soll / was fünden sie dann? Dann fürwar ihnen ist Himmel vnd Erden verborzen. So in das verborzen ist / so sol ihnen der dreck im menschen nit vertrawt werden vom leib heraus zu führen / aber wol wann er heraus kommen ist / hinwegzutragen. Es solten sich noch vier Bauren darab verwundern / das solche leut Doctores vnd Meister seind / haben ein solche lange zeit her / als die Bücher außweisen / von den zeiten Esculapij / Hipocratis / ꝛ. bis auff die stunde den dreck noch nicht erkent. So nun einer vltimam materiam nit erkent / was mag derselbig in prima erkennen?

Vnd



Vnd der primam nicht erkent/ der erkene  
 auch vltimā nit/ vñ haben sich doch hierin  
 etwas geflissen auß dem Hymel zunem-  
 men/ vnd den Scorpion / die Bißch / vnd  
 den Krebs für ein genüßsam verstand ge-  
 halten/ vnd den Hymel darmit gar zu ver-  
 stehen. Vnd disen zeichen ist nichts dar-  
 von befolhen / sonder der Hymel will in  
 den dingen baß erkannt werden / vnd ihr  
 schämend euch nit das ihr plerzend nach  
 den Lastaffeln/ die nit von den erfarnen/  
 sondern von den vermeynten gemache  
 werden. Nun ist diß allein darumb an-  
 gezeigt / dz der modus pharmacandi auß  
 dem grund der eussern Creatur genom-  
 men wirdt / vnd gründtlich in erkantnuß  
 derselbigen wircket / vñnd nicht auß ewer  
 Fantastischen Anatomey. Vnd dieweil  
 ihr den Hymel vnd die erd nit erkennen/  
 wie dieselbigē im menschen ligen / vñ wie  
 die Concordanz der eussern vnd innern  
 stand/ dieweil seind ihr der ehren nit wert/  
 das ihr den dreck angreifen/ ich geschweig  
 die gesundheit vnd das leben. Ihr habe  
 euch



euch aber in das Hurenhaus gesetzt / den man nichts darein redt / was sie handeln des haben sie macht.

Nun aber das ich weiter mein fürnehmen nachgang / so wissen wie vor angezeigt ist die diuersitas der eussern Spheren vnd Globen / das also im leib die diuersitates zu erkennen seind / vnd der / der Himmel vnd Erden erkent / der erkent auch den ganzen menschen / vnd der den ganzen menschen erkent / derselbige ist ein Arzt.

Nun aber so vil vnd hie die stercora fennen in ihrer vnderscheid / wie vngleich der stercus intestinorum vnd der stercus cerebri gegen einander standen / hat ein solchen vnderscheid. Die stett verenderen vltimam materiam, vnd nit virtus digestiua, dann die stett seind nach ihrer natur geordnet / anderst vnd anderst dann die andern / dann die dasigen. Dieweil nun die stett das vrsachen / vnd die stett werden geursachet durch die eusseren impressiones, das also im leib wie aufferhalb die

D



loca stehend / so ist von nöten ein anzei-  
 gung zu geben / wie dieselbigen einander  
 nach in der vltima materia handeln. Nun  
 nimpt sich die ordnung der stett auß der  
 forme des menschen edler vnd vnedler/  
 achtbarer vnd vnachtbarer / demselbigen  
 nach also auch dise ordnung gehet. Nun  
 ist aber das natürliche im menschen / das  
 vltimam materiam gibt / desselbigen ort  
 werme / dann als offft ein virtus digestiua,  
 als offft ein andere werme / vnd als offft ein  
 andere werme / ein ander Putrefaction/  
 vnd ist doch alles eine werme / vnd ein  
 Proceß der Putrefaction. Nun wissen  
 hierinn / das in allen den dingen die wir  
 essen / alle die stercora in ihnen haben / wie  
 sie in vns gehen. Aber zu gleicher weiß  
 wie ein mensch der da lebt / der ist frisch/  
 so er todt ist / so stinckt er. Nun lebt alle  
 speise die wir essen. So sie nun lebt / so  
 stincket sie nit. Nun aber so sie in mensche  
 kumpt / so gehet an die wirkung virtutis  
 digestiuae, dieselbige hat so vil werme / so  
 vilerley digestiones seind / das ist / so viler-  
 ley ster-



ley stercola seind. Nun ist die theilung in der werme / wie in virtute digestiua, das anderst vnd anderst die vltimæ materiae geformiert werden / Darinn verstanden / das die ordnung des grossen Archei ist / das dieselbige werme außgetheilt seind durch den leib / durch innhalt der stete / auff das die adelheit der Person vorbehalten werde / also / das nach dem vnd der sterCUS ist / nach demselbigen in virtutem digestiuam verordnet / vnd dieselbigen stercola in der speiß ligen / ein jeglicher seiner Digestiff / das ist / mit derselbigen narung seinem emunctorio zugeschickt.

Diueil nun in der speiß solcher vnflut ist / wie genügsam erzehlt / so merckend das die ordnung vnd saking der menschlichen glider in dem gestanden ist / daß der mund reyn von den sterCORIBUS behalten werde / des gleichen die augen vnd die ohren. Darumb so ist der selbige sterCUS der solchen gestanck in ihm hat / den Intestinaen befolhen / auff das andere digestiones nichts bey ihnen haben als die jenige / vnd



anderst mit der werme dann die Intestinen. Dann der Intestinen werme feulet alle ding in den stinckenden dreck/ darumb ist die werme vnd die materia in gleicher züsamenfügung. Dann wissen/ das so wunderbarlich die werme getheilet ist in ihre gradus / so wunderbarlich die forme der menschen einander vngleich sicht. Nun wissen hierinn alles das so wir essen / nimpt sein vrsprung vom eussern / Darumb die eussern müssen die innern neren. Züglicher weiß wie die Lebern muß fürung haben / das nimpt sie auß der Lebern der Erden/ Das hertz muß sein auffenthalt haben/ das nimpt es auß dem herten der Erden. Also speiset die irdische Gall die leibliche Gall/ das irdische Hirn das leibliche Hirn / vnd also Milk vnd Milk / Nieren vnd Nieren / Blüt vnd Blüt. Dann himmel vnd erden ist ein mensch/ vnd nit mehr/ hat auch weder weniger noch mehr. Darumb so oft ein biß der speise / also oft Himel vnd Erden in der hand/ das ist/ im selbigen bitten/ dann  
in ihm



in ihm ligen alle partes des menschen/  
vnd in ihm haben alle creata der Spher  
vnd der Globen sein vollkommen leib.  
Vnd also ist der leib der Himmel vnd erde  
in der hand des essenden / Also ist der  
Himmel vnd die Erden / vnd wirt also sein  
leib auß hymel vnd erden gefüret. Vnd  
also ist ein ding Himmel vnd erden in der  
essentia, aber nit in der form.

Nun wissend / dieweil der mensch die  
ganze welt ist / vnd isset dieselbige / vnd ei-  
nes ist das ander / vnd das ander ist das  
ander / wie obstehet. So nun die speiß  
eingenomen wirdt / so ist gemelt die erste  
wirckung im magen / nachfolgend in den  
andern glidern. Nun ist mein fürnemen  
hie nit zu erklären das erklärt ist / sondern  
weiter wissen / wie die wirckung vnd die  
ultima materia suozend vnd wie sie ge-  
scheiden werden. Erstlich so wir essen/  
so ist im munde eine gleiche wirckung wie  
im Magen / Auß dem volgt nun / das im  
mund der mensch mag erhalten werden  
natürlich. Also zu verstehen: Ihr sehend



44 De Pharmac. modo

Das im munde der stercus intestinorum  
geboren wirdt / auß vrsachen / es ist die ei-  
nige wirkung. Also wer seine speiß im  
munde behelt seine stund / wie virtus di-  
gestiua vns erhelt / so wirt dieselbige speiß  
an dem ort von den bilern / rachen / vuula,  
vnd vom obern theil des schlunds dige-  
riert vnd gedewet. So sie nun gedewet  
ist / so wirt da ein stercus vnd ein putrefa-  
ction. Der stercus zeigt an daß das Nū-  
triment recht separiert sey / Das putrefas-  
ctum das im munde bleibt / zeigt an das  
Nutriment von ihm genommen ist / aber  
putrificiert / auß vrsachen / daß der werme  
so vil nicht ist im munde / als in dârmern.  
Nun ist an dem ort digestio geschehen /  
vnd gesondert das Nutriment vnd der  
stercus, gleich als wol als im Magen / vñ  
ist gleich als wol ein volkomen Nutri-  
ment / als das im Magen / dasselbige Nū-  
triment wirt ohnenpsindtlich / vnd ohne  
schlucken in die Lebern gezogen (das sind  
die Anatomeyen / daruon mich frewet zū  
schreiben) vnd so es in die Lebern kompt /  
so ist



So ist es eben als vnd als satt / als were es auß dem Magen kommen / vnd der leib erhelt sich darinnen / vnd hat satt vnd genüg daran. Auff das wissen / Essen im magen ist ein ordnung der Natur / behalten im mund ist auch ein ordnung der natur. Die im Magen essen / bedörffen mehr als die im mund essen. Dann der Magen geht in die feiste / vnd der mund geht in die gesundheit / vnd zeucht von der feiste. Die in den Magen essen / dieselbigen vnderwerffen sich vilen franckheiten / die im mund essen / die vnderwerffen sich keiner franckheit. Die im magen essen müssen hoch vnd wol gespeist werden / dann er hat den gustum / das er haben wil was im schmecket / vnd so man ihm sein wolgefallen nicht gibt / so euffert er sich / dann er ist auff dem geschleck gebawt. Die aber im mund essen / achten des geschmacks nichts / sondern der mund digerirt das der magen nit verdewen mag.

Wie ein grosser vnderscheid hierinn zu verstehen ist / das mercken eben / dann



also haben sich erhalten die Heremite /  
 vnd die / deren stercus intestinorum nicht  
 gefunden ist worden. Der höchst vñ größt  
 Heremit Baptista Johannes / derselbige  
 hat gessen Locustas vñnd mel syluestra.  
 Nun seind locustæ junge fruchte / die noch  
 in proßlen stehen / dieselbigen hat Johan-  
 nes Baptista abbrochen / vnd dasselbige  
 in das wilde honig / wie dann die wilden  
 Ymen in den walden wohnen / gestrichen  
 vnd geduncket. Nun merckend in dem  
 das junge locustæ seind nutrimenta, dann  
 auß ihnen werden nutrimenta. Nun  
 scheiden sie sich in dem / was jung ist / das  
 sol vngekochet geessen werden von aller-  
 ley geschlechtem der Locusten / vnd so es in  
 das alter seiner zeit kompt / so sol es dem  
 gekocht vnderworffen werden. Also was  
 in das gekocht kompt / dasselbige gehet in  
 magen / auch in mund / was nicht darein  
 kompt / gehet auch in den mund vnd inn  
 magen / jedoch aber mit dem vnderscheid:  
 Was jung ist ersettigt dem Magen sei-  
 nen willen nit / dann er hat keine freude  
 in ro-



in rohen dingen / sondern im geschleck.  
Nun hat Johannes des geschlecks sich  
nit genehret / darumb hat er den Magen  
nit gespeiset / sunder den mund / vnd durch  
den mund seine glider erhalten / kein  
speck / schmer / freud / fröligkeit gezogen /  
oder erweckt / sonder von disen allen abge-  
standen / vnd benügt bliben in der ersetti-  
gung des mundes / also ist ihm Locusten  
vnd mel syluestre ein gnügsame speiß ge-  
wesen. Also habē sich auch erhaltē andere  
Heremiten / deren gnügsamlich warhafft-  
tig wissen ist in vergangner vnd gegen-  
wertiger gedechtnuß / die da nicht habent  
gessen / deren stercora intestinorum nicht  
seind gefunden worden / dann sie haben  
den Magen nicht gespeist / sonder allein  
im Munde die glider erhalten / vnd na-  
türlich vnd genügsam. Natürlich / vnd  
nit wider die Natur / sonder mit der Na-  
tur / Nit von oben herab / sonder auß dem  
Himmel vnd auß der Erden gefürt / Wañ  
in den proßlen wirt der mensch erhalten /  
wirt auch erhalten in Bischen.

D v



ad parte legitima

48 De Pharmac. modo

Was sich im magen dawet / das gehet durch den bauch auß / was sich im munde dawet / wirfft der spenchel mit ihm auß. Darauff folget nun / die weil im munde generatio stercorum intestinorum ist / haben sich dieselbigen Heremiten gepflegen ihren mund zu wuschen / vnd den sauber zu halten / so sie solche speise im mund verdawet haben gehabt / damit ihn der stercus intestinorum nicht herauß stuncke. Solches haben ihre Discipel vnd ire Ordens leut gesehen / vnd so offte sie geessen haben / den mund gewuschen / vnd das in ihre Statuten genommen. Aber des haben sie vergessen / daß sie die speiß in magen lassen fallen / vnd suchen magen gezele / vnd nicht der glider notturfft / wie die von denen sie sich zu sein berhümen / vnd deren ordnung sie haben fürgeben.

Wie es aber ist vnd beschicht / das sicht man wol.

Tractas





## Tractatus III.

**I**n weiter so wissen  
 von der farben der sterz  
 cora zu reden / nachdem  
 ihr sein herkommen / vrs  
 sprung / stett vnd örter /  
 wie gemelt ist / erfahren  
 habt. Nun sollend ihr wissen / das seine  
 farben entspringen auß der materia die  
 auß dem stercus wechst. Dann zu glei-  
 cher weise wie in ein bitten brot die ganz-  
 ke Anatomey des menschen ist / also ist  
 auch in demselbigen alle farben / wie die  
 theil inhalten / vnnnd wie das hirn oder  
 herz in dem brot vnsichtbar ist / also seind  
 auch vnsichtbar derselbigen farben dar-  
 inn / vnnnd seind doch gestalt vnd farben  
 darinn / wie ein beer in ihm hat den ganz-  
 zen baum / also werden in den Nutrimen-  
 ten allerley weiß / allerley schwarz / vnd  
 dergleichen die andern farben gefunden /  
 die sich eröffnen / so sie gehen in die formi-  
 rung seiner gestalt. Also werden die far-  
 ben /



50 De Pharmac. modo

ben gleich so wol erhalten durch die Nutrimen-  
trimenten/als das Corpus das sie fermen/  
vnd nemen ihre stett ein vnd ihre eigens-  
schafft / zügleicherweiß wie ein Nutri-  
ment. Solches ist also von den farben  
der narung geredt. Nun ist ein andere  
farben/ die nicht der narung ist/ sonder  
der stercoreum, vnd ist nur ein farben/vnd  
scheiden sich in dem / das die Nutrimen-  
ten alle farben inn haben / aber die sterco-  
ra haben nur eine. Von disen farben der  
Nutrimenten nimbt die Galle ihre grie-  
ne vnd ihre gilbe. Dann in ihr ligen die  
zwo farben mit allen ihren gradibus. Dar-  
auß dann volgt / so sich die farben schen-  
den/vrsprung der Ictericia/da ist eine hö-  
her dann die ander geferbe / anderst vnd  
anderst dann einer farben züsteht. Dann  
niemandis mag außsprechen die vil grad  
die da seind in den farben. Also auch in  
dem Hirn mancherley farben / die weisse  
vnd die blåwe ligen / Darumb mancher-  
ley farben in hirnfranchheiten erfunden  
werden. Desgleichen röte vnd blåwe im  
blüt



blüt der adern vnd des fleisches / die also auch durch streich oder schläge eröffnet werden. Dann alle farben die sich der massen begeben / ligen im leib / vnd werden herfür gebracht durch den streich / wann in dem streich ist kein farb / aber im leib seind farben / die der streich vrsachet zu eröffnen. Also wissen das die farben anzeigen dieselben frackheiten / von welchen ich hiemit schreib / Sondern allein von wegen bessers verstands zu erkennen die stercorischen farben / das anzeige.

Wie nuhn die farben so vil als in der Globel vnd Sphera ligen / dergleichen auch also im menschen vollkommen ligen vnd seind / so wissen wie obgemelt ist von den emunctorijs vnd virtutibus digestiuis, das in denselbigen sondere vnd aber sondere farben ligen / wie also dieselbige virtus digestiua inne helt die farben / nach art seiner statt / also derselbige stercus derselbigen farben eusserliche farben behelt. Nuhn merckend was die eusserliche farben seind, Zü gleicherweiß wie nichts war  
che



ehe das Hymel vnd Erden war / vnd jek  
 etwas ist / also ist auch nichts die farbe ehe  
 das die farb darein kommen seind / also  
 etwas ist gewesen ehe Hymel vnd Erden  
 war / das aber nit das jekunder ist. Etwas  
 ist gewesen darinn die farben gemachet  
 seind worden / nichts ist aber gewesen ge-  
 gen dem das jekunder ist. So nun das  
 jekunder ist / wider nichts wirdt / so bleibt  
 das was vor ihm war. Also so die farben  
 vergehend / so bleibt auch das das vor ihm  
 war. Nun wissen das also zu verstehen:  
 In der speise seind alle farben / darauff  
 ihm der leib alle seine farben nimbt. Nun  
 nimbt ers von der speise / vnd so ers von  
 der speise genommen hat / so bleibt die da /  
 die da war ehe das die farb war / als dis  
 Exempel außweiset. Nichts anderst ist  
 der mensch dann ein dreck / vnd auß ihm  
 gemachet. Also der massen / so nun der leib  
 die fuorung von der speise nimpt / so bleibt  
 nichts da / als allein der vnflat / auß dem  
 die speise gewachsen ist. Also mit der nar-  
 rung gehend auch hinweg die farben.

Vnd



Vnd wie von der narung der stercus ver-  
berbleibt / also bleibt auch die erste farb ver-  
ber / das ist / die farb bleibt da / in welche an-  
dere farben alle eingossen seind. Nun  
seind dieselbigen hinweg / darumb ist es  
ein todt ding / vnd ein farb die kein farb  
ist.

Nun erkennen die farben bey der farb-  
ben / die vor der farben gewesen ist / nach  
art einer jeglichen statt / vnd bey der selb-  
bigen farb erkennen die gesundheit des  
menschen / vnd wo solche farben anderst  
seind dan kein farb / so bedeuten sie krank-  
heiten. Dann ein jeglicher stercus soll  
ohne farben sein. Darumb die vnder-  
scheid in farben ist eine in der essentia , vñ  
die andere im todten Corpus. Gleich wie  
ein mensch der da lebt / vnd darnach todt  
ist / also seind die zwo farben gegen einans-  
der zu vrtheilen. Darumb so erkennen nu  
weiter von den farben der stercorum,  
Die stercora die sich per anum reynigen /  
haben die farben darinn die nutrimenta  
derselbigen statt digeriert werden. Also  
die



die lebern hat auch derselbigen farben. Also wissend wie vilerley der farben sind/ also sind auch vilerley nit farben / das ist/ die nit farben seind/ vnd doch das Corpus der farben. Vnd darumb das mancherley corpora der farben seind / darumb seind auch mancherley nit farben. Als der Koz zeigt an die farben des Hirns/ dann der Koz hat keine farben / Die farbe nimpt das Hirn/ vnd das nit farb ist gehet in stercus / der kein nutriment ist. Also werden die vltimæ materiae widerumb primæ materiae, vnd prima materia ist nichts/nichts ist auch vltima materia/das mittel ist aber / das ist/ das in das erste gegossen ist / vnd von dem letzten genommen. So nun andere farben dann vltima materia haben soll / das ist die farben primæ materiae, so ist es dem Arzet vnderworfen zu vrtheilen. Dann die farben zeigen an franckheit des leibs/vnd nit franckheit des stercus, dann der stercus ist nichts/macht weder gesund noch franck. Darumb so ist von nöten am aller ersten / das ist die farben



farben nach der localischen Anatomey  
kennen / auff das ihr wissen auß den far-  
ben vrsprung des herkommens zu erken-  
nen / vnnnd bey demselbigen die materien  
der franckheit zu verstehen / dann also wöl-  
lend die farben erkant sein / vnnnd die ge-  
schlecht der stercora, Nit das die stercora  
gearkneyet werden / sonder die statt dar-  
auß sie kommen. Darumb ihr felschlich  
die Coleram / Melancoliam / r̄. hie an  
dem orth vrtheilen / die solcher statt noch  
vrsprung der franckheiten niendert be-  
greiffen noch verfassen mögen.

Also dieweil nichts im leibe ist / das we-  
der Colera noch Melancolia heißt noch  
ist / weder in virtutibus digestiuis, noch  
sunst in physico corpore, so mercken wie  
es sich herlauff in der gemeyne die far-  
ben in dem stercus / vnd das in den wege /  
wie ein jeglichs glid an sich nimpt was  
ihm züstehet. So nun im selbigen ein-  
bruch einfiel / vnnnd sich scheidete die nar-  
rung von seiner statt in sein emunctori-  
um, alsdann gehet die narung / vnd kein

G



stercus, sondern die vnzeitige nutrimenta  
brechend auß / das ist aber kein stercus/  
darumb du vnbillich purgierest. Vnd ob  
es sich begeben / das hierinn ein stercus ohn  
geschmack gefunden wurde / vnd solche  
farben darbey / so wisse / das etliche nutris  
menta gedawet / vnd den stercus derselbis  
gen statt schicken / vnd aber darunder  
lauffen die denselbigen stercus felschen.  
Auff solches solt ihr acht haben / vnd dar  
bey wissen / das per anum vil virtutes di  
gestiua sich reynigen / dergleichen vil vir  
tutes digestiua sich im vrina reynigen /  
also das ein jegliche virtus digestiua sein  
sunder emunctorium hat zum menschen  
auß / aber wol sein sonder emunctorium  
auß seiner Region / darumb so mögen sich  
die stercora inn mancherley wege erzei  
gen / so die nutrimenta vndigeriert mit  
lauffen. So ist auch in solchen dingen  
zu wissen / das die zeit vnd der Himmel sol  
che colores gibt / in der gestalt / dieweil die  
Impression sein ist / in den dingen des  
leibs Microcosmi / so muß derselbige die  
Impressio



Impression gedulden. Auß dem folget  
nun brechung derselbigen virtutis diges-  
tiuæ, so durch den Himel dieselbige ge-  
brochen wirdt / das auch gebrochen wirdt  
ihre Operation / vnnnd nachfolgend also  
einfluß von farben machet / nachdem vnd  
eins jeglichen Impression wircket oder  
handelt. Vnd wie solches geschicht / am  
selbigen orth eröffnen sich die farben der  
Nutrimenten / vnd die franckheit die ligt  
in der selbigen virtute digestiua. Nun  
folget hierinn / das du nicht solt modum  
pharmacandi verstehen zu purgieren /  
sondern virtutem digestiuam zu widers  
bringen / so höret der stercus selbst auff.  
Dieweil das nit beschicht / dieweil ist für  
vnd für das wachsen der franckheit. Zu  
gleicher weise als wenn ein ding anhebt  
zu faulen / so tregt es mieß vnd ander vn-  
flat das in ihm wachst. Solches alles  
wirt euch angezeigt vnnnd repetiert etlich  
mal / auff das ihr nicht im dreck ertrincken /  
das ist / das ihr nicht ewer leben darinn



verzehren / sonder lehren das ihr weiter  
mögen kommen.

Nun ist weiter zu wissen / wie von der  
mancherley farben vrsprung geredt ist  
worden / auch von ihrer theilung / wie auß  
den güten vnd lebendigen dingen so mans  
cherley farben wachsen / vnd darinn vers  
borgen ligen / darauff dann der stercus sei  
ne farben nimbt / vnd darnach zu vrthei  
len. Also dergleichen wissen auch hie weit  
ter von den todten farben / das ist / von  
den farben die da wachsen auß der feule /  
darmit ihr dieselbigen vnderscheid wiss  
sen / auff das ihr nit dieselbigen farben  
für die lebendigen ansehen. Dann züglei  
cherweiß wie ein fatum auß einem gestor  
benen menschen / also wachsen auch dise  
farben. Nun ist das fatum nit der mensch /  
aber es zeigt den menschen. Also seind die  
farben nicht die farben / von denen sie kom  
men / sie zeigens aber an. Vnd wie das fas  
tum nichts warhafftigs / wissentlichs ans  
zeigt / also zeigen auch die farben nichts  
warhafftigs noch wissentlichs an. Da  
rumb



rumb so wissen / das den farben nichts nach zureden oder zühandlen ist / dann sie wachsen nit auß der natur die franck gemacht hat / sonder sie wachsen auß einer andern generation / darumb zeigen sie die alte generationem nit an. Dann in dem scheiden sie sich von einander / daß die farben in der Putrefaction iren vrsprung nemen / welche Putrefaction gescheiden ist von dem lebendigen / gleich wie ein schatt von einem Körper / der ihm etwas anhangt / vnd doch nichts ist. Nun nimbt sich die Putrefaction also / so der stercus gescheiden wirt durch sein Digestiuisch emunctorium, vnd wirt durch krafft einer franckheit / so in derselbigen Digestiff ligt geschehen / so vrsachet dieselbige franckheit ein faulen stercus, dann er ist nit wie er sein soll. Gesund sol er außgehen / so faulet er nit. So er aber vngesund außgeheth / so faulet er. Dann ein jeglich ding das da faulet / faulet auß der franckheit / die in ihm gelegen ist in seinen gesundheiten. Wie jr sehend daß das fleisch



60 De Pharmac. modo

faulet vnd stinckend wirt / auß vrsachen  
 daß das lebendige fleisch franck ist. Vnd  
 wiewol es für gesund geacht wirt / so sind  
 doch die anfang der franckheit in im / auß  
 denen es geursachet wirdt / nachfolgende  
 im todt derselbigen zu eröffnen / das ist/  
 durch die faulung erzeigen. Dann alles  
 das / das da nit faulet / hat in seim leben  
 keine franckheit gehabt / ist auch keiner  
 franckheit vnderworffen / als die Geme,  
 als der Balsam / vnd seine liquores. Die  
 weil nun aber der mensch an dem ort im  
 leib franck ist / vnd im selbigen der stercus  
 geboren / so fault er im leib von stund an/  
 dann er kompt auß vngesunder Digesti  
 on / so aber die Digestio gesund ist / so fau  
 let er im leib nit. Was außerthalb dem  
 leib beschicht / gehet hie mein Argument  
 nicht an.

Nuhn ist die vrsach der Putrefaction  
 mancherley / nit not hie zu erzehlen / Dan  
 mein fürnemen den stercus zu tractieren /  
 wie dann modus pharmacandi innehalt /  
 vnd das ander beschriben de virtutibus  
 diges



digestiuis. Nun aber dieweil die irzung  
eingefallen ist, das auß den coloribus der  
stercorum/vnangesehen ihr herkommen/  
die iudicia von ihnen genommen seind  
worden / vnd dardurch irzung eingefürt.  
Dann kein color der da kompt auß der  
Putrefaction / zeigt nichts warhafftiges  
an/sie kompt auß ihrer statt/ darumb so be-  
helt derselbige stercus seiner statt vnd sei-  
nes ortz farben. Als der stercus cerebri  
behelt seine weisse vnd blåwe. Also so  
nun sein stercus fault / so fault er auff die  
farben auch/ꝛ. In der Gallen ist grien  
vnd gelb / was auß ihr faulet das lendet  
auch in die farben / vnd also auch von an-  
dern allen zu verstehen. Nun aber ist ein  
brechung hierinn/also/ So die franckheit  
in die feule felt / so verändert sie die far-  
ben / machet/die stercora die da solten in  
rot gehen/ferbet es in schwarz vnd braun/  
Vnd dises wirt fälschlich geheissen Me-  
lancolia / kompt auß dem blüt / vnd soll  
Melancolia sein / darumb ist das vrtheil  
diser farben falsch. Also weiter/ so die Pu



trefachion solt weiß vnd blaw sein / so ge-  
 het auß krafft derselbigen franckheit in  
 ein grawe / dasselbige soll nun Flegma  
 sein / vnd niemandts weißt was Flegma  
 ist. Dergleichen die andern farben alle  
 verändern sich in disen putrefactionibus.  
 Vnd darumb so ist nicht noth zu vrthei-  
 len / dann dise vrtheil weren alle falsch /  
 dann es verkeren sich die farben in ander  
 wesen / das keine gewisse mütter von ih-  
 nen kan erkendt werden / auß deren sie ent-  
 springen. Wie also mit den farben be-  
 trügligkeit ist / also ist auch mit der Sub-  
 stanz betrügligkeit. Dann anderst vnd  
 anderst vsachen die franckheiten die fäu-  
 lung / also / das keiner mag sprechen / das  
 ist colera vitellina, vnd also sol sein Ar-  
 ket sein. Dann vsach / darumb das falsch  
 ist die / das anderst vnd anderst virtus di-  
 gestiva geursachet wirdt zu diser Sub-  
 stanz. Nun also folget / daß die heilung  
 nicht auß der colera vitellina genommen  
 soll werden / sondern auß der Digestion  
 anligen / es sey dann der dreck wie er wöll.

Also



Also folget die summa der Cur auß der Digestion anzeigung / vnd nicht auß anzeigung der stercora. Also bedeut diese substanz vnd diser Color nichts / als allein dz eine franckheit in derselbigen Digestion ligt. Was aber die franckheit ist / wirt gar nicht angezeiget.

### Beschluß.

Zu beschluß diser dingen allen / wissen das diese erkendtnuß all sollen kommen vnd entspringen auß den eussern virtutibus digestiuis, so beide sphaera anzeigen / dieweil der Arzet am selben ort gebresten hat / dieweil mag er nichts beschliessen in den dingen die den leib antreffen. Dann auß des leibs anzeigung wirt kein Arzet geboren / dann die Microcosmische natur ist in microcosmo vnbegreiflich / so sie außerhalb in der grossen welt sichtbar vn greiflich ist. Dann das muß ihm ein jeglicher Arzet vorbildē / war auß der mensch geschaffen sey / dasselbige darauß er erschaffen ist / zu erkennen / Vnd wie dassel-



bige ihn lerndt/ also ist auch das / das auß  
 ihm gewachsen ist. Der mensch ist auß  
 der welt gemachet/ nicht von einem stuck/  
 sonder von allen/ vnd in alle stuck gewach  
 sen vollkommen/ wie dan das ist/ auß dem  
 er gewachsen ist. Sehend ein kind wie es  
 geboren wirt allein auß vatter vnd müt  
 ter / vnd ist nur ein limbus / Dann er ist  
 der limbus, auß dem das wechset das er  
 selbst ist. Vnd wie der limbus ligt in der  
 Matrix / vnd ist nichts dann ein leiten/  
 vnd wirt darauff alles das so Vatter vnd  
 Mütter an ihnen gehabt haben / also auch  
 der Mensch/ des Vatter vnd Mütter Him  
 mel vnd Erden seind / darumb so ist er  
 auch gewachsen in ihre natur vnd partes,  
 vnd die bildtnuß Gottes / darumb schei  
 det sich hie nichts/ als allein die bildtnuß/  
 die natur bleibt vngescheiden gegen vater  
 vnd mütter. Also wissen auff das/ die  
 weil Himmel vnd Erden des menschen  
 Vatter vñ Mütter seind/ vnd der mensch  
 am letzten auß ihnen beschaffen / das ihr  
 auß dem Vatter vnd auß der Mütter ler  
 nen er=



nen erkennen das kind / vnd Anatomiert  
die ältern vnd nit die kinder. Vnd so jhz  
wissen haben der Himel vnd der Erden/  
so haben jhz wissen des menschen in als  
lem seinem wesen. Darumb ich billich sa-  
gen mag / das irrig vnd falsch alle die ge-  
lehrt werden / die jhz fundament vom  
kind nemen / vnd nit von den / auß den es  
gewachsen ist. Ich red nit von den kin-  
dern / deren kinder Väter auch kinder  
seind / sonder ich rede von vatter vnd müt-  
ter Ade vnd Eue. Vnd laßt euch die bild-  
nuß nit hindern / dann also hat es Gote  
geliebt vnd gefallen / in solcher bildtnuß  
geboren werden. Darumb so wächst auß  
der bildtnuß kein Arzet / aber auß dem  
lauff der in der bildnuß ligt / das ist  
der ganz Himel vnd Erden/  
dann wirt der Arzet ge-  
boren vnd erzogen.

FINIS.





Getruckt zu Straßburg bey  
Christian Müller.

1578.








ad partem sequentem








ad parte legitima













154844

ULB Halle

3

003 266 729




Handwritten text at the bottom edge of the page, likely bleed-through from the reverse side.





3 ad partem...







Pharmacandi modus.

**is der Arz**  
**n Menschen zu Purz**  
 n habe : Vnd was für  
 äden auß mißverstand des  
 purgirens entspringen.

den Hoherfahrenen herren  
 phrastum Paracellsum, beyder  
 Arzney Doctorn.

*n gratia & priuilegio Casareo.*



M. D. LXXVIII.